

Duznou Bungzdaengz Duzmeuz

Gyoengq doengzhag, sou dwg mbouj dwg laihnaeuz gou yaek gangj haenx dwg aengoj duznou caeuq duzmeuz, roxnaeuz dwg gojgaeq Danghmuj caeuq Gezsui ba? Yienghneix sou couh loek lo! Gou gangj aengoj “duznou bungzdaengz duzmeuz” neix dwg baenzlawz yiengh ne? Bouxlawz siengj dingq, couh cingj laebdaeb doeg roengzbae ba.

Gou daeuj gaisau gou swheij gonq: Gou heuh Lonz Yinzdan, dwg dahniq ngeih nienzgaep, bingzseiz caeuq vunz ndaw ranz roxnaeuz baengz-youx ndei youq doxcaez, gou rox gangj rox lwnh, ak gangj ak buek, saedcaih dwg boux “bak lai” he. Hoeng gou bouxvunz baenzneix vuedbued, seizneix cix miz yiengh gazgiengh he hawj gou hamj mbouj gvaqbae—mbouj gamj caeuq lauxsae naj doiq naj doxgangj, raen lauxsae couh siengj deuz!

Saehcingz dwg yienghneix: Ngoenzde cuengq-hag le, gou lumj bingzseiz nei, youq gyausiz sij cozyez sat le couh okbae guhcaemz yaep ndeu. Cingqyouq gou youq lajroq sam laeuz yawj coh baihygae, sawqmwh dingqnyi singyiem sugsed cingq byaij gyawj gou, sing de caeuq sing gwnz goqdangz yienghneix ndeidingq. Byawz daeuj lo? A! Dwg lauxsae yijvwnz ban dou—Mauz lauxsae!



Gou baez doeksaet, siengj daengz gonq couh dwg vaiq di deuz! Singyiem daj lajroq baihdong cienz daeuj, gou ganjgip buet coh baihsae. Buet daengz gyauej lajroq dwg aenlae, gou sam yamq guh song yamq, laj din lumj caij dujfwj, lumj mbin nei daj sam laeuz roengz daengz ngeih laeuz. Daengz ngeih laeuz le, gou dingh aensim roengzdaeuj, ngeng rwz dingq. Gou dingqnyi sing gwnz laeuz yied daeuj yied gyawj, yied daeuj yied hung. Mbouj ndei, Mauz lauxsae hix byaij roengz ngeih laeuz daeuj lo!


Baenzlawz guh? Ndoj haeuj gizlawz bae? Gou sikhaek youh gaenjieng lo, ganjvaiq laebdaeb deuz. Miz aen gyausiz he dou hai dwk, ndoj mbouj ndoj haeujbae? Mbouj ndaej mbouj ndaej, lumjbaenz

mbouj ancienz. Mbiengneix miz aen lae he, ganjvaiq roengzbae; mbiengjide miz gungx gok ndeu, ndonj haeujbae ndoj yaep ndeu gonq caij gangj. Hoeng gou cungj roxnyinh gizlawz cungj mbouj ancienz, gizlawz cungj deng lauxsae yawjraen. Couh yienghneix, gou lumj duznou deng duzmeuz gyaep nei, gip ndaej goq mbouj ndaej ra roen, vueng-muengz buetdeuz.

Doeklaeng, gou ndoj youq gungx gok ndeu caj haujlai nanz, seiqhenz ciemhciemh mbouj miz sing, caemrwgrwg lo, sim gou hix ciemhciemh dingh lo. Seizneix gou sawqmwh miz di doeknaiq, gou naemj yaep ndeu, gag gangj gag naeuz: “Gou dwg guhmaz ha? Mauz lauxsae dwglau baenzlai ma? Raen lauxsae mbouj dwg wnggai cawjdoengh gvaqbae dongx ma? Ai! Gou seizlawz cij guh daengz mbeihung mbouj launyaeng ne?”

Gyoengq doengzhag, seizneix sou rox gou gangj aen goj duznou caeuq duzmeuz neix dwg byawz luba? Moix baez siengj daengz gienh saeh neix, gou cungj nyinhdaengz mbei swheij saedcaih daiq iq lo. Gou itdingh menhmenh gaij gij mbouj ndei neix bae, bienq ndaej mbeihung gagsaeng di.

(ngeih nienzgaep Lonz Yinzdan)



Rumz ci “huhu”, mbawfaex yiengj “sasa”, fwn doek “fafa”, fwn dauqdaej doek lo.

Fwn daiq gij rumzbya singjsien nyinh-mbaeq, daiq gij sing goksasa, daiq gij maq-muengh vunz lai, daeujdaengz lo.

Dwg dingqnyi sing de gonq. De daj gwnz ndoi gizgyae buet daeuj, lumj fanhmax biucauj, lumj gyauhyangjyozdonz cingq yienj-danz, “diuzgo” ndaw fwn couh yienghneix hainduj yienjiengq lo. “Sasa, huhu, fafa” dwg fwn ciengqgo, “momo, mbe, mbe, vaeuvae” dwg doenghduz danqhaen.

Caij yawjraen dwg gij yiengh de. Lumj maesei, lumj bwnvaiz, lumj fagcim, daemj deng gumzraemx gwnz dieg, raemx ndaw gumz sikhaek fufeb gvaengz youh gvaengz; lumh daengz dujva, dujva gingqyienz lae “raemxda”;

cup deng gomak, gomak bibi “byoem-gyauej” ……

Naedfwn lumj duzduz cinglingz iq, youq gyangmbwn diuqfoux, yawjraen gyoengqvunz daeuj lo, couh diuqbeiz caeuq gyoengqvunz “guhcaemz”, de buet daengz gwnz gyauej, gwnz liengj, gwnz buh, gwnz haiz…… gyoengqvunz bae, hoeng, gyoengqvunz cungj dwg ndoj de, neix sawj naedfwn miz di gyaengj lo, hoeng, sikhaek, naedfwn youh lumz bae caez, laebdaeb angqvauvau bae gyaep bae caeuq vunz guh-angq.

Fwn ciemhciemh noix lo. Hoengheiq bienq ndaej sangswt, sawj vunz roxnyinh sim-sangj uksingj; fwn doek gvaq le, doenghduz lumj daj ndaw ninzdaek raezrangh cwxcaih ndiu daeuj, duzmeuz, duzma, duzroeg saenq aennadang deng fwn rwed dumz de, baenz roix baenz roix cawraemx angqfwngfwng sinz coh seiq baih, lumj sinz gij naetnaiq ndaw ndang bae; fwn doek gvaq le, doenghgo bibi buengq-buengq, lumj dwg cingq doiq vunz guh-unj……

Gou byaij haeuj gyang fwn bae, mbouj siujsim caij deng gumzraemx, raemx liengzsis sinz deng gwnz ga, mokfaenx caeuq youheiq deng fwn rwed le, couh laeglemx mbinsanq bae, simcingz sawqmwh bienq ndaej soengswt ……

Fwn, gou maij mwngz, maij mwngz gipgip muengzmuengz daeuj, maij mwngz laeglemx doiq bae, maij mwngz dinghdinh louz roengz-daeuj, maij mwngz gyaundeidei mbouj yienhda.

(seiq nienzgaep Banh Yidingz)



Byukgyaeq Saenzgeiz

Gwnz diegnywj heuyauyau miz aen byukgyaeq “saenzgeiz rox bienq” he.

Gyanghaet, dahcej mbungqmbaj, daeggo duznou caeuq daegnuengx duzmoed doxiu caez okdaej guhcaemz, gyoengqde yawjraen aen byukgyaeq ndeiyaew he. Dahcej mbungqmbaj sawqmwh miz aen siengjap geizgiuj he: “Raeuz yungh aen byukgyaeq guh aennungxningh daeuj guhcaemz ba!” Daeggo duznou, daegnuengx duzmoed doxcaez han naeuz: “Ndei ha! Ndei ha!” Gyoengqde dawz byukgyaeq buen daengz gyang diegnywj heuyauyau bae, youq gwnz byukgyaeq cuengq nye faex iq he, aen nungxningh ndeindi’ ndi he couh guh baenz lo. Gyoengqde youq gwnz aennungxningh mwngz saet gou diuq, nungx hwnj ningh roengz guhcaemz angqvauvau.

Gvaq yaep ndeu, dahcej mbungqmbaj youh siengj daengz aen ceijeiq he, “Raeuz yungh aen byukgyaeq neix caij guh aen gyanglozsanj he ba!” De naeuz. Gyoengqde ra daeuj geij diuz nywj, doxcaez guh ndei aen gyanglozsanj gyaundeidei he. Naengh youq gwnz gyanglozsanj, gyoengqde angqfwngfwng riengz rumz mbinyagyag.

Banringz, fwn doek lo. Mwhde, daeggo duznou siengj daengz aen banhfap ndei ndeu, de dawz aenbyukgyaeq bienqbaenz aen liengj ndaej dangj rumz cw fwn he. Gyanghaemh, daxheiz ronghndwen daiq ndaundeiq iq daeuj hwnjban lo. Gyoengqde couh dawz aenbyukgyaeq dangguh aen mbonq unqnem he, ninz youq baihdaw, raeujrubrub, yaep ndeu couh ninzdaek lo……

(ngeih nienzgaep Vuz Yijgyah)

Roxnyinh Gyaundeidei

Boh ha, mwngz guhlawz dawz duzmax lwg aeu ganjem san baenz de bae coemhfeiz lwne?

Mwngz laihnaeuz duz boh san hawj lwg de gyaundeidei lai ga?

Mbouj dwg bw, couhsuenq mwngz san ndaej ndei baenzmaz bae, lwg goj roxnyinh gyaundeidei mbouj gvaq duz lwg san baenz de

go, lwg lai gyaenz duz lwg san de.

Aenvih duzde dwg lwg gag bae gwnz bo gvej ganjem, gag dawz ganjem buq baenz song mbiengj, gag san baenz duzmax bw!

(Daj 《Bonjsei Sim Lwngnyez》
(Veiz Gizlinz raiz) senj okdaej,
Lwgfwngzmeih/卢奋
长 hoiz)

